

Ha'u nia respetus ba:

- Sua Exelénsia Jose Ramos Horta, Eis-Prezidente Repúblika Demokrátika Timor-Leste
- Sua Exelénsia Dulce de Jesus Soares, Ministra Edukasaun, Juventude no Desportu
- Sua Exelénsia Filomeno da Paixão de Jesus, Ministru Defeza no Ministru Interiór Em-Ezersísu
- Xefe Estadu Maior F-FDTL Koronel Calisto "Coliati" Santos Coli
- Diretora Eskola Ensinu Báziku Sentrái Fatumeta Fernanda Caldeira Belo

Bondia maluk sira hotu,

Obrigada mai hamutuk ona ho ami ohin iha ne'e hodi selebra konkluziun Estadus Unidus Amérika nia Navál Seabees nia projetu enjeñaria ba dala 100.

Ha'u kontente tebes fó bemvindu ba ami-nia konvidadu-de-onra sira, ne'ebé nu'udar apoiante forte ba Seabees husi inísiu too agora.

Doutor Ramos Horta sai ona nu'udar apoiante importante ida ba Seabees durante tinan barak. Defaktu, iha momentu ne'ebé ha'u too iha Timor-Leste, purkoinsidénsia ha'u hasoru Doutor Horta iha Aeroportu – no nia hatete mai ha'u atu lori membrus Seabees barak liután mai Timor-Leste!

Ministru Filomeno de Paixao vizita ona Seabees Camp no partisipa ona iha seremonia barak relasiona ho Seabees.

Ministra Dulce de Jesus Soares serbisu makaas ona ho Seabees iha sira-nia obras konstrusaun salas Eskola sira no instalasaun sira seluk hodi apoia estudante sira no edukasaun iha Timor-Leste.

Ha'u sente sira-nia apoius hatudu importánsia husi knaar Seabees nian – no defaktu katak bainhira Seabees hari'i buat ruma, ne'e sai obra ho kualidade aas – hari'i hodi uza ba tempu naruk tebes.

No projetu ida-ne'e hanesan susesu boot ida. Seabees ativu ona iha Timor-Leste foin maka liu tinan 10, tanba ne'e projetus ba dala 100 hanesan susesu ida ne'ebé di'ak tebes.

Feto no mane Amerikanu sira husi Batallaun Navál ba Konstrusaun Móvel - Lima dedika ho fuan no laran tomak ba iha projetu ida-ne'e.

Sira serbisu iha oras barak nia laran hodi asegura katak obra eskola ida-ne'e bele halo-hotu ho seguru no ho kualidade exelente.

Ida-ne'e maka projetu ba dala tolu ne'ebé grupu Seabees ne'e kompleta ona iha sira-nia destakamentu durante fulan neen – agora prolonga tan fulan rua tanba COVID-19.

Servisu husi Estados Unidos Amérika nia Navál Seabees ne'e apenas ida husi maneira barak Estados Unidos Amérika apoia Timor-Leste, iha tempu di'ak no tempu susar nia laran.

Dezde independénsia, Estados Unidos Amérika apoia ona ho orsamentu \$500 miliaun liuhusi projetu kooperasaun sira hodi konstrui Timor-Leste ida ne'ebé forte no auto-suficiente liután.

Ami halo servisu liuhusi projetus barak husi ami-nia **Ajénsia Estados Unidos Amérika ba Dezenvolvimentu Internasionál (USAID)**, dezenvolvimentu lideransa joven no programa sira ba interkámbiu edukasionál, Ministériu Agrikultura Estados Unidos nia projetu Nutrisaun no Edukasaun, apoiu finanseiru ba ONG sira , no barak tan. Ami kontinua serbisu makaas hodi konklui Estados Unidos Amérika nia Millennium Challenge Corporation Compact ho Timor-Leste.

No ami mós iha ne'e hodi apoia Timor-Leste iha tempu susar COVID-19 ho orsamentu besik \$2 miliaun ba assisténsia direta, nomós assisténsia ami fó ba organizasaun internasionál sira ne'ebé mós benefisia Timor-Leste. Ezemplu, USAID iha Washington oferese \$30 miliaun ba Programa Mundiál Alimentar nia voo umanitáriu, ne'ebé tuir ha'u hatene sei hahú iha tempu badak no inklui Timor-Leste. Estados Unidos Amérika kontribui ona liu \$4 biliaun iha mundu tomak hodi kombate COVID-19.

Programa sira ne'e hotu hametin ita-nia relasaun no parseria ne'ebé sei lori benefísius ba ita-nia nasaun rua iha tinan barak tuir mai.

Konstrusaun eskola ne'e, hanesan mós ho Seabees nia projetu sira seluk, hadi'ak liután qualidade no kondisaun seguru eskola nian.

Maske ho sira-nia destakamentu prolongadu no ho dezafiu úniku sira seluk durante pandemia globál COVID-19, Seabees serbisu makaas no mantein sira-nia ánimu aas atu nune'e bele oferese sala-de-aula rua ne'e ba Eskola Ensinu Báziku Sentral Fatumeta.

Defaktu, ida-ne'e mak Seabees nia Projetu daruak. Iha ita-boot sira-nia sorin karuk (ha'u nia sorin loos) ita-boot sira bele haree sala-de-aula rua furak ne'ebé hari'i mós husi NMCB-5 iha fulan Jullu tinan 2018. Ha'u mós sei lembra partisipa iha serimonia inagurasaun iha tempu ne'ebá. Projetu sira ne'e hamutuk sei benefisia estudantes liu 1,300.

Enkuantu Seabees nia grupu exelente ida-ne'e fila hikas ba sira-nia baze, grupu seluk tuir-mai, NMCB-3, sei too iha ne'e iha tempu badak.

Sira sei hahú konstrusaun eskola ho salas 3 iha Baucau ho orsamentu estimativu \$350,000. Sira sei konstrui mós lutu perímetru seguransa foun iha Aeroportu Baucau. Estados Unidos Amérika nia Navál Seabees nia projetu sira sei kontinua hodi ajuda mellora instalasaun sira

edukasaun nian, sentru saúde sira , no prioridade sira seluk iha Timor-Leste.

Entaun, ita fó saudasaun ba Seabees no celebra sira-nia projetu ba dala 100 iha Timor-Leste!

Obrigada